



De Coena Domini,

In qua praecipue taxatur Pontificiorum Prophanatio & Idolomania multiplex,

CONCIO VI.

Hr Undeuchtigen vnd Geliebten in Christo Jesu/ Es weissaget Daniel Cap. 12. Dan. 12. von dem Belschen Antiocho, das ist/vom verfluchten Antichrist/vom Papst zu Rom/ er werde thun was er wil / er werde sich erheben vnd auffwerffen vber alles/das Gott ist/ vnd greulich reden wider den Gott aller Götter / vnd es werde ihm gelingen bis der zorn aus ist / denn es sey beschlossen/ wie lang es weren sol/ seiner Väter Gott werde er nichts achten/ er werde weder Frauen lieb/ noch einiges Gottes achten/ denn er werde sich wider alles auffwerffen. An des waren Gottes stat werde er seinen sonderlichen Gott Maosim ehren/ von dem seine Väter nichts gewusst haben/ vnd werde ihn ehren mit Silber / Gold / Edelgestein vnd Kleinodien / Er werde denen/ so im helffen Maosim stercken / grosse ehre thun/ vnd sie zu Herren machen vber grosse Güter / vnd ihnen das Land zu lohn auftheilen. Diese weissagung Danielis widerholet Paulus 2. Thes. 2. vnd spricht: Der tag des Herrn werde nicht kommen / es sey denn / das zuvor komme der abfall / vnd offenbaret werde der Mensch der sünden/vnd das Kind des verderbens/ der da ist ein widerwertiger / vnd erhebe sich